

四庫全書

集部

欽定四庫全書

眉菴集卷九

明 楊基 撰

七言律

罷職初寓句曲山居

在句容縣南一舍近三茆峰昔陶隱居所處也

兔逃且畧鳥投林脫彼官資暢此心便覺夜來清夢出
始知人住碧山深詩窮任使金銷索酒樂何妨雪滿簪
更擬怡雲問弘景華陽仙洞事幽尋

賣袍

鵷鷺行中舊賜緋團花分縫織秋葵齋宮夜直雞前著
內殿春朝馬上披仙露滴身猶點點御香薰袖尚離離
山中無復瀛洲夢換取金錢當酒貲

寄諸葛同知彥飛

白髮慵梳步屨遲老於田野最相宜每當酒熟花開日
正值身閒客到時雪屋夜燈因婦織月波秋舫為僧移
而今此樂同誰說只有鄉人馬遠知

宜秋軒對月并序

四首

余自懼患奔走南北佳景良辰往往愧負及來
杜曲時豐景幽秋氣既中月色倍常自十四至
十七與杜氏兄弟舉酒邀月夜分乃休感佳節
之難逢而良會之易失也夜賦一詩以示諸杜
留以為故事云洪武辛亥寓句容

仙家玉斧斲猶偏天上瓊樓看欲全未滿固當勝既滿
已圓終不似將圓今宵對影人先醉明日成珠蚌有緣

惆悵吳宮與唐殿冷風魚鑰夜如年

右十四夜

其二

龍宮浮出白蓮花海宇通明濕素霞琪樹有陰銀闕冷
玉盤無缺絳河斜十分夜色初開鏡多少離人正憶家
但舉觥籌行百罰莫聽更鼓疊三撾

右十五夜

其三

已覺來遲未捲簾漸經樓閣照東簷清光念爾隨秋減
白髮憐余向曉添自對嫦娥歌宛宛誰教楊柳舞纖纖

昇州憶似鄜州看香霧雲鬟濕翠奩

右十六夜

其四

坐久星繁影漸虧也應天轉玉輪歆蔡丘伯主初盟後
天寶君王欲倦時繞樹鵲驚霜落早吹簫人恨夜眠遲
不須戚戚悲圓缺長使清光灑酒卮

右十七夜

中秋約登茅峰不果寄羽士蔣玉壺

仙人待月大茅峰樓閣高寒近可通表裏山河俱皓白
古今烏兔自西東一塵不住空明外萬象都懸倒影中

欲便吹笙跨黃鶴人間或有雨兼風

宿清元道館簡羽士巫山隱

手閱靈文對羽流道心真境兩清幽
雙松過影知將晚一雨生涼覺近秋
丹井有靈泉似玉石碑無恙字如鉤
欲求大藥調精魄却笑山人已白頭

哭高季迪舊知

鸚鵡才高竟殞身思君別我愈傷神
每憐四海無知己頓覺中年少故人
祀托友生香稻粳魂歸丘隴杜鵑春

文章穹壤成何用，哽咽東風淚滿巾。

豫章早春

茸茸草色變枯荻，
簌簌寒梅落逕苔。
山頂雪惟朝北在，
水邊風已自東來。
不須銀管催鶯出，
便好珠簾為燕開。
見說嶺南春更早，
桃花流水勝天台。

登洪都城憶滕王閣故基

豫章城郭楚江濱，
帝子笙歌迥不聞。
十載以前猶有閣，
三王之後豈無文。
春風南浦青青草，
暮雨西山淡淡雲。

若對畫圖悲蛺蝶落霞孤鶩正思君

浦口逢春憶禁苑舊游

春水消盡草生齊細雨香融紫陌泥花裏小樓雙燕入
柳邊深巷一鷺啼坐臨南浦彈流水步逐東風唱大堤
還憶當年看花伴錦衣駟馬玉門西

過豐城

雲樹參差接遠汀隔沙誰識是豐城芙蓉不禁行人採
薜荔多依古樹生寒店雞聲烟寺遠滄江鴻影暮川晴

欲將三弄桓伊笛吹向船頭喚月明

夜泊臨江城下江清月白悵然有懷

萬里清江急有聲一蓬愁影對寒檠當時鸚鵡杯中酒
何處龍香火底笙斗轉東南知夜半月臨子午應潮生
不多鏡裏青青髮又向今宵白幾莖

省垣對雨有懷方員外

二首

老去惟耽是詠詩擬將詩癖待君醫何愁不到王摩詰
自恨無過杜牧之城外綠陰聯騎日省中春雨聽鶯時

歸來莫待秋風後荷葉荷花正滿池

其二

煮得新醅灑灑紅省垣誰與晚樽同人當暫別情偏惡
詩到無聊語更工江浦荷花雙鷺雨驛亭楊柳一蟬風
論文若到虞楊地應對清江憶范公

江郭對雨

鷓鴣催雨一雙啼江郭崇高竹樹低嫩葉暗將枯葉換
新梢爭與舊梢齊席因留客長虛左簾為看山盡捲西

自笑為郎今白首也曾通籍向金閨

寄牛理問斗南

每笑揚朱吝一毫恥將刀筆事蕭曹鯨鯢未覺滄溟濶
鷹隼寧知華岳高白壁一雙酬劇孟黃金百鎰鑄山濤
小牕新種娟娟竹深暎春風紫蒂桃

懷班大叅景通

一榻凝香省署西短屏深掩樹陰低笑談每為相知發
詩句惟應送別題不以學從當世曲直將名與古人齊

別來幾日偏相憶風雨江村半夜鷄

懷萬郎中伯玉

憶曾簪筆侍金鑾華髮驚看照鵷冠倩可承家如有子
俸能供祭勝無官杯緣量減常先醉帶為愁多覺屢寬
應念故園秋色裏露珠香滿菊花團

寄劉儀部子高

開遍芙蓉雨滿津西風又冷楚江蘋眼前替紋流如水
天上羲和釀得春黃葉亂蟬南浦樹紫髯一騎上京塵

此時詩興誰能識還憶山陰賀季真

懷王節推彥文

烏帽輕籠雪滿簪古苔怪木訟堂深
官清猶有長憂色年老惟存不競心
與吏議刑秋寂寂教兒讀律夜沈沈
酒闌可解時相憶月落霜飛鵲繞林

立秋日懷方員外

幾日西清晝掩屏綠塵幽蘚遍閒廳
病中事少翻嫌健醉裏愁多只願醒
悞響閣鈴飛夜鵲偶攤書卷落秋螢

萍蹤已辦東南別風雨長更各自聽

次前韻遣興

已覺新涼入畫屏江聲樹影在西廳
人情近午猶思浴客夢驚秋却易醒
月淡渚蓮香掩鷺雨深池草濕栖螢
從今不恨無情緒茅屋西風細細聽

冬夜宿江右省垣懷劉子高司業

曖曖微宵耿玉繩澄澄夜色麗觚稜
月明鷓鴣千枝雪霜冷枇杷一樹冰
魚鑰戒嚴森畫戟鳳團銷醉擁青綾

瀛洲盡是羣仙府鶴背應須得共登

七月三十日祖母初度時年八十九

白髮青瞳壽者身每逢佳節話咸淳百年未盡四千日
來歲還週九十春遷客無家空望拜孤臣有表竟誰陳
今朝風雨茅茨底應對兒孫說遠人

思親

一割鴻溝消息稀隻身湖海尚流離乾坤何事有今日
父子可憐逢此時悵望只添新涕淚艱難應變舊鬚眉

愁心恨不隨春雪飛上吳山椿樹枝

將歸金陵留別省垣諸友

吳山歷歷向東遙望盡寒雲意未消多難定煩慈母憶
畸魂時賴故人招曉霜猶凍枇杷樹春雨還生杜若苗
歸去不愁江水濶野鷗羣裏木蘭橈

望夫石

在采石東山上

古荔荒苔綠滿身至今翹首望歸人玉容已化峰頭石
戰骨應為塞上塵風雨不銷千載恨鶯花又度一番春

誰將湘女爛編竹種向東風侶有因

登峨眉亭

在牛渚山

峨眉亭上看秋山低蹙輕顰淺淡間雨過微雲添一抹
晚來新月闌雙鸞不愁商女行相妬長恨離人去未還
我亦峨眉山下客偶因西眺憶鄉關

先生祖蜀中
故末句及之

謁小姑廟

月帔星冠敞翠屏白腮紅頰兩眉青魚鱗小殿波紋滑
龍尾長旗雨氣腥巫女沈牛歌宛轉彭郎回馬拜娉婷

蘭舟願祝東風便一夜夷猶過洞庭

大姑山廟遇老衲年七十餘云是東林寺僧時廟
厄回祿方謀建興有作

白髮星星照赤髭春風邂逅水仙祠我非當世陶彭澤
渠是前生遠法師結習已空終不染塵根俱盡竟何思
猶將大乘神通力笑寄須彌向一枝

鄱陽湖喜晴

鄱陽湖裏看春晴山色波光蕩漾明短髮已羞芳草綠

閒身應羨一鷗輕
風來柳上偏無力
雲到松梢更有情
却羨蘇堤舊游路
碧桃千樹響流鶯

舟泊潯陽懷申屠衡

江烟漠漠草毵毵
且泊蘭舟近水南
一鷺暝投槎外石
雙鴻低拂樹邊嵐
夢隨春雨歸華屋
愁逐東風上短簷
柳色漸深人漸遠
幾時花裏共停驂

晚泊湓浦逢冷節

小雨籠陰護晚霞
柳邊停棹聽啼鴉
湖光已綠皆春草

風信猶寒是杏花到處青鞵隨蛺蝶誰家紅袖泣琵琶
匆匆客裏逢佳節那得行人鬢不華

過黃州

當年逐兔跨神州此地羣雄首建謀亂後江山猶故物
春來花草亦新愁歸人拜塚營茅宇過客停舟問竹樓
惆悵臨臯驛邊柳淡籠烟雨白沙鷗

武昌夜泊懷古

鄂渚柔莎夜雨餘漢陽雲樹暮烟初休誇健筆題鸚鵡

終悔空緘託鯉魚遺臭功名成底用
浣人塵土欲何如
滔滔黃鶴樓前水日夜東流恨未除

欄衡殷浩
桓溫度亮

呂仙祠

祠在黃鶴樓東江山形勢非神仙不足居此風
清月白之夜時聞鐵笛之聲

兩點方瞳漆有光紫髯眉綠面如霜
千年一笑來黃鶴
三度長吟到岳陽
日月自隨天地老
江山不為古今忙
又携鐵笛瑤池去
亂插桃花醉一場

過洞庭

雨後春江似潑醅
洞庭猶更綠於苔
碧湘樓閣千花繞
紫府旌旗十殿開
春色不隨流水去
暮雲長帶客愁來
閒身也是滄浪客
鷗鷺匆匆莫浪猜

過洞庭龍君廟

陰陰微殿肅神都
地位清嚴鎮五湖
水府奏工題玉檢
淵泉錫爵送珠符
雨分赤鯁衝波出
風遣青鼉踏浪呼
時有蠻商獻袍笏
廟前拋肉飼神烏

岳陽回仙有題

夢覺邯鄲月未西
碧紗斜插杏花枝
丹霞淺淡微生頰
白酒甘甜不上眉
戲畫榴皮成鶴舞
笑揮銅劍作龍騎
夜來小宴瑤池上
贏得麻姑一著棋

夢覺

囊衣單薄藉無氈
天氣將寒每自憐
歲月無情人老大
風塵如此路三千
片時兒女燈前笑
多在關河夢裏船
那得全家江浦上
短蓑微雨卧秋烟

舟中聞隣船吳歌有懷幼文來儀

輕帆短櫂泝烟波，疊渚回舟奈遠何。
一路詩從愁裏得，二分春向客中過。
江通漢水晴偏綠，山入湘雲晚更多。
何處思君腸欲斷，楚妃祠下聽吳歌。

途次感秋

嫋嫋西風吹逝波，冥冥灝氣逼星河。
宣王石鼓青苔澁，武帝金盤白露多。
八陣雲開屯虎豹，三江潮落見鼉鼉。
沅湘一帶皆秋草，欲采芙蓉奈晚何。

渡漢江

九天灝氣肅高秋，萬里銀河入海流。
西楚人才多用晉，中原豪傑暫依劉。
久無翠羽供王貢，時有彤弓賜列侯。
自惜飄飄雙短髮，也隨江漢一輕鷗。

經潭州哭李太守

潭州即今長沙府太守名
黼字子威死節元忠臣

丁卯科中第一人，誓將孤壁障妖塵。
百年事業歸儒者，萬里江山泣老臣。
肝膽當時紹余闕，英靈此日配張巡。
我來竟就船頭拜，一盞寒泉薦綠蘋。

三湘

曾向三湘望五溪
水源汨汨盡流西
狂思醉裏千鍾少
老覺人間萬事低
移艇出江當月上
煮茶消睡恰鶯啼
近來詩句慵思索
逢著青山趣謾題

過黃陵廟

萬里蒼梧接桂林
九疑雲氣隔湘陰
東風又洒瀾瀾淚
明月長懸悵望心
雨裏鷓鴣春色晚
廟前莎草落花深
荒碑獨有元和刻
苔色蝸涎已半侵

江邊尋花值雨

獨自尋花傍水濱
霏霏小雨浥輕塵
正憐啼鳥能留客
却笑東風也妬人
柳色半昏先近晚
梨花漸濕更多春
湘娥應解知人意
兩點脩眉結翠顰

興安道中

青山一半入青雲
碧磧千回轉夕曛
松碣看來多漢刻
竹祠隨處是湘君
路經猿洞諸峰直
泉入灘江兩派分
莫據孤鞍聽蜀魄
野棠疎雨又紛紛

二月晦日來陽江口寄書

自笑無家類轉蓬
年光何事更怱怱
數聲鶯響千山裏
一樹花開萬竹中
夜入瀟湘偏厭厭
雨春來杜若自宜風
兒童別久應驚問
華髮飄蕭侶老翁

和陽道中見海棠

桂陽江口望和陽
疊疊烟雲入渺茫
高樹綠陰千嶂濕
野棠疎雨一簾香
縱無春在猶回首
況有鶻啼合斷腸
惆悵東湖堤上柳
暖風輕絮正悠揚

衡陽有懷 二首

寒郭沿洄楚水陰
鶯花寂寂雨沈沈
江山不盡登臨意
節序偏驚老大心
客裏茶烟長自冷
衡陽柳色為誰深
峰前亦有回歸雁
不肯隨人到桂林

其二

鳴鳩日日喚春陰
坐挹爐熏萬慮沈
對雨只添鄉國恨
看花無復少年心
烟皆榆柳青猶淺
水是瀟湘綠更深
不道沙邊有城郭
短籬茆宇映疎林

客中寒食有感

客舍蕭條百尺天，衡陽城下柳陰船。
梨花又濕初晴雨，草色仍含已禁烟。
車馬看花悲昔夢，綺羅傳燭待明年。
三吳八桂東西路，萬里空山哭杜鵑。

其二

減衣時節尚寒天，暫倚東風泊畫船。
十里樓臺仍細雨，五侯池館又新烟。
且簪楊柳酹佳節，莫對桃花憶去年。
總是無情也，腸斷鷓鴣聲裏又啼鵑。

桂林與蔣張二指揮觀兵

大字青旗寫豹韜連環金鎖束征袍
千艘夜泊烟江濶萬竈晨炊瘴嶺高
燕領將軍髯似戟鵠形俘虜面如刀
自慙不得同高適走馬西河看屬橐

桂林即興

二首

曾見重華巡狩來灘江廟宇野棠開
山無檜柏皆巖穴地有芝苓盡藥材
花布短衣齊膝製竹皮長帽覆眉栽
也應風土交州近丹荔紅蕉不用栽

其二

江為池塹石為城南去蒼梧兩日程
碧殿尚存虞帝像青山不廢伏波名
蘭根出土長斜掛榕樹成門却倒生
時有苗人與徭女負薪輸布事科征

聞江聲有感

歲事匆匆兩鬢星坐看簷影下虛屏
寒梅向暖商量白舊草迎春斷續青
夢以俗牽終夜惡酒因愁散片時醒
秦山密雪巴山雨不似江聲不耐聽

晚發瓜洲

江花江草望中稀，相趁畸人萬里歸。
鷗逐晚潮爭北上，雁隨春雨向南飛。
船頭野老新巾幘，馬上王孫小帶圍。
嗟我遠來頭總白，洛陽塵土滿征衣。

宿揚州南門

春風曾在此停舟，白髮重來又杪秋。
何事瓊花猶古物，當時玉樹總新愁。
孤城小驛連荆杞，野水荒墳見髑髏。
夜靜有人船上哭，可應鄉井是揚州。

舟次邵白有懷徐幼文

文章小技恥雕虫也遂羣才赴洛中多病不宜秋色裏
相思只在暮江東鷄豚籬落茅茨雨鳬鴨陂塘菡萏風
欲買一樽澆寂寞傷心不與故人同

過高郵即景

蒼烟斜日照孤城嗟我情多却倦登田豕白蹄高似鹿
野蚊花股大於蠅人家結屋多蘆葦官府輸租半藕菱
莫向西風詢往事旅懷蕭索豈堪勝

淮安新河候船

城郭逶迤曲遶河塵沙滿眼北風多行人淚落山陽笛
逐客魂銷郢水歌江總歸陳嗟老矣淮陰在楚奈貧何
明朝又鼓征西棹帆影翩翩逐逝波

至龜山有題

在盱眙

魚鱉搗訶激怒瀧腥風沫雨濕蓬窻寶珠佛像山王護
鐵鎖神工水母降石勢參天龜出洛潭光照夜蜃浮江
我行未暇求陳迹且醉船頭濁酒缸

夜宿開封郡齋贈林通判

輝輝燈影照更闌
卮酒憐君為解顏
鏡裏風塵雙白髮
夢中烟雨萬青山
逢迎意懶長思靜
撫字才疎欲乞閒
母德君恩俱未報
不勝悲感淚潺湲

懷汝寧許知府

能以寬閒繼古風
府中無事不從容
諸生秋試多高選
八縣春耕少惰農
富貴何須皆汗馬
文章正欲去雕虫
同庚況有聯曹誼
風雨相思意萬重

太原春日郊行

屐齒車輪更馬蹄
綠莎隨處踏成蹊
無人為惜閒花落
有暇來聽好鳥啼
步屨愛沿流水曲
開懷欲與衆山齊
詩成誰復吹簫和
却向藤蘿石上題

清明懷故園

縷縷輕烟細細風
秋千池館萬家同
高低草色相參綠
深淺桃花各自紅
人意盡隨流水去
風光都在笑聲中
多情白髮并州客
坐對西南雪滿峰

春日山西寄王允原知司

并州春半無花可賞追憶舊遊情動于中因賦長句
五首公退之暇詠而味之庶幾春色之在目也允原

知司善詠詩者就錄以贈

是詩先生親筆知司曾孫至今藏于家

十里烟光濕翠苔二分春色到花朝無人快擊華奴鼓
有伴同吹弄玉簫遍地錦圍歌處席滿身珠壓舞時腰
莫嗔老子疎狂甚曾醉揚州廿四橋

其二

藥苗初出水生蒨老麝收香鹿養茸二月春光纔霽雪
一番花信又顛風參差鸚鵡全身白淺淡棠梨半面紅
正是江南寒食近滿簾飛絮雨濛濛

其三

畫船搖槳蕩晴波步障圍風踏軟莎簫鼓隊衝黃鳥散
綺羅人比白鷗多不知酒與愁成敵長恨花為病作魔
回首六橋青草徧水光山色近如何

其四

花時無處不黃鸝偏到垂楊著意啼人立晚風携便面
馬臨春水惜障泥踏歌趁拍催腔急旋舞回身應節齊
遙想故山行樂地紫苔侵遍十年題

其五

一莖白髮已堪嗟況是東風兩鬢華醉裏誤將裙作草
老來羞以帽簪花疎狂不識眉雙結敏捷曾經手八叉
閒喜日長公館靜自分新火試新茶

寄舊契張來儀

秦山萬點接烟霞東出關門髮已華
無奈異鄉仍哭子可能孤館不思家
貧逢北客長賒酒飯比南人只喜茶
我住東林數間屋每同談坐到栖鴉

懷宋大叅公讞

西山暮雨對秋屏曾共銜盃話北征
五月雪花猶亂落一春沙草未全生
曉因謀使窺邊略夜問降王為寇情
東閣晝長香篆小盡繙圖畫憶經行

寄陳管勾則威

全晉封疆寄太行西來絳水入平陽千山草樹惟無竹
七月衣裘已有霜俗喜背牛兼帶犢人能擒虎類驅羊
憐君詩思清無敵細覓寒梅認色香

無題和唐李義山商隱

嘗讀李義山無題詩愛其音調清婉雖極其穠麗然
皆託於臣不忘君之意而深惜乎才之不過也客牕
風雨讀而悲之為和五章

一瓣芙蓉是綵舟棹歌離思兩夷猶風鬟霧鬢遙相憶

月戶雲牕許暫留
波冷綠塵羅襪曉
恨添紅葉翠顰秋
雙鸞鏡裏瑤臺雪
任是無情也上頭

其二

纔向瑤臺覓舊踪
曙鴉啼斷景陽鐘
薄施朱粉妝偏媚
倒插花枝態更濃
立近晚風迷蛺蝶
坐臨秋水亂芙蓉
多情莫恨蓬山遠
只隔珠簾抵萬重

其三

細骨輕軀不耐風
春來簾幙怕朝東
人間玉宇三山隔

天上銀河一水通
眉暈淺顰橫曉綠
臉銷殘纈膩春紅
冰絃莫奏清商曲
滿地霜華泣翠蓬

其四

夜合花邊待月來
宮中輾轆響春雷
笙調恨譜參差度
錦織愁紋宛轉回
樓上綠珠知報主
座中紅拂解憐才
傷心兩炬緋羅燭
吹作銀荷葉下灰

其五

為雨為雲事兩難
蕙心蘭質易摧殘
箏移錦柱秋先斷

漏滴銅壺夜不乾
羅幙有香鶯夢煖
綺牕無月雁聲寒
芙蓉一樹金塘外
只有芳卿獨自看

附沈通理次韻無題五首

通理居蘇之崑山
宣德正統間詩人

蘭漿雙欹倚桂舟
隔花臨水思夷猶
香囊玉佩勞相贈
綉幄銀屏惜共留
愁繞鳳臺秦樹暝
夢回巫峽楚雲秋
多才苦被春情惱
鏡裏潘郎雪滿頭

行雨行雲少定踪
夢回時節怕聞鐘
竹枝寄恨心偏懶
桃葉題情意轉濃
香冷綉鞍閒騾裏
燭殘金障掩

芙蓉紅樓綠水無多遠如隔江山幾萬重

纖纖斜日弄微風腸斷仙山碧海東鸞鏡有塵空自
掩雁書無路若為通愁橫柳葉眉顰翠泪濕桃花臉
暈紅盡道芳年易憔悴莫教青鬢作秋蓬

油壁香車幾度來赤闌橋畔起驚雷夢隨暮雨陽臺
去愁踏春波洛浦回青鳥銜書通密意綵鸞留詠惜
奇才芳心一寸如紅燭總遣燒殘未作灰

瑣牕珠戶別離難蘭蕙柔姿惜易殘曲斷瑤箏銀甲

冷書留錦字墨花乾羅衾積夢驚春晚寶鴨銷香覺
夜寒檻外碧桃花自好一年芳景共誰省

眉菴集卷九

欽定四庫全書

眉菴集卷十

明 楊基 撰

五言絕句

新月

光斜鏡露邊影沒眉鋪黛香烟隔院來知有佳人拜

殘雪

庭雪半消殘猶存舊臘寒春風知有意留待隔年看

春夢 二首

春夢復春夢春夢何時曉啼鳥忽相呼花殘人又老

其二

春夢復春夢夢與覺時同縱使風吹破相省侶夢中

五色

五色綉羅衣花多枝葉稀春來不敢著怕引蝶雙飛

陌上桑

青青陌上桑葉葉帶春雨已有催絲人咄咄桑下語

優人乞米

恢諧一面笑慷慨千鍾粟相逢莫歎貧農夫方夜哭

隔簾聽歌

低處最多情聲遲拍轉停坐中腸亦斷況乃隔簾聽

仕女美女二圖

獨立長門裏徘徊無所親可憐前殿月不照後宮人

其二

無人問起遲不語自支頤此意春風解深閨未嫁時

花開

花開醉不休
花謝莫深愁
縱使花長在
東風也白頭

壺中二色桃花

素頰映紅腮
西園共折來
憐渠竟先落
知是最先開

折花贈內并代答

二首

人面玉娟娟
花枝更可憐
憑從畫眉手
折寄鏡臺前

其二

一朵折春風
花濃意更濃
而今暎花面
不似向時紅

詠眉

雙彎畫得勻烟柳鬪輕顰莫對初三月姮娥妬殺人

詠眼

秋波含脉脉未轉已情通千古風流意都綠一盼中

瓶中插梨杏桃李四花有詠

各自媚春光輕紅暎淺妝日融花氣暖忘却是誰香

施君眠雲堂

展雲作衾裯一榻秋陰冷曉睡重慵騰壓碎梨花影

倪雲林畫竹

寫竹是傳神何曾要逼真惟君知此意與可定前身

題畫

二首

重來竹滿陂竟失茅茨處忽記別君時門前五株樹

其二

泉爭亂石穿松激回飈響山經讀未終猿啼孤月上

墨竹

烟梢忽縱橫風葉屢偃仰一榻卧山中靜聽秋雨響

墨葵

晞髮待朝陽黃眉映墨妝午時人搗藥衣上有玄霜

竹為僧賦

猿啼石澗幽月出秋林靜孤僧耿未眠坐對蕭蕭影

九鷺圖

秋塘白鷺栖烟淡草淒淒一隻來沙晚青山日又低

彈琴高士

江靜月在水山空秋滿亭自彈還自罷初不要人聽

柳塘春燕

花落燕飛交春風在柳梢玉樓皆綉幙高處莫安巢

扇上畫

四首

雨歇見青山菰蒲第幾灣鷗來又飛去只有釣舟閒

其二

江遠愛山低沙虛覺樹危靜中誰共賞橋上立多時

其三

雙桐石上栽四月始花開不見朝陽鳳秋風欲下來

其四

別夢蘋花外歸心燕子前齊王不好瑟塵土滿朱絃

刺客四詠

匕首

秋啼聶政魂寒漬荆軻血報讐兼報恩刺人還自殺

筑

朝擊無秦聲暮擊皆死曲誰知腹中鉛矐却壯士目

椎

公子終救趙留侯徒中車平生萬金客不及圯橋書

劍

差差三尺光氣奪萬乘貴立成千載功不出五步內

轅門十詠

胄

雙簷鳳翅開敵見即心摧莫厭黃金重貂蟬自此來

鎧

重函鎖鉄堅葉葉黃花錯將軍勇絕人尋取三副著

蠹

羽葆矗青雲風搖翠羽分
貔貅一百萬於此認中軍

鉞

寵錫王階前專征欲定邊
奏功須右秉長在節旄先

矛

鈎鋒紫電明瘦幹青蛇滑
馬上利長兵刺人須丈八

刀

掛帳殺風寒新磨血未乾
酒酣曾斫陣不敢醉中看

弓

力能穿七札 弣搯金梢短十萬羽林兒
無人開得滿

箛

斜挿虎豹皮 掛向軍前戰射退黑山夷
歸來有餘箭

袍

袍花對縫裁 上刺黃金字著處萬人看
是為君恩賜

馬

未鼓即騰驤 身輕箭不傷明朝卸金甲
歸牧華山陽

天平山十四題

龍門

天開一罅通石古雙崖破中有波濤痕知是龍飛過

石屋

六丁運神斤鑿石為巨屋風雨遶入牕夜夜山鬼宿

五丈石

落星長百尺風雨忽中斷至今雷火焦突兀猶存半

白雲泉

泠泠白雲泉流向白雲邊泉水流不斷白雲飛上天

一線泉

石竇小如針泉飛一縷金天風吹不斷穿過白雲深

卓筆峰

露蘚凝斑管烟蘿束紫毫山靈罷揮洒卓立萬山高

飛來峰

高峰侶玉臺何處忽飛來定向西天竺曇花頂上開

釣魚磯

老父兆非熊遺石此山久誰操百尺竿重試連鰲手

蟾蜍石

神墓月中來化作千歲石曾吞玉杵霜清露時時滴

頭陀巖

頭陀不可見巖石似當時草長齊肩髮雲裁百衲衣

華蓋松

飛蓋結龍形斜扛九曲清流螢枝上落疑是紫微星

四時亭

泉聲四時清山色四時好不知寒暑移但覺松杉老

宿雲軒

盈盈山中雲就我簷下宿昨夜雲不歸空閒半間屋

照鏡湖

團團山中石下照太湖影如何一鑑中三萬六千頃

端陽十詠

百索

紅映釧金黃雙纏腕玉香閨愁千萬里羞比綵絲長

釵符

紅縠剪金臺輕羅簇艾花不須靈筴篆心靜自無邪

守宮

玉臼搗薰風蛾眉怨六宮長門深似海何用印花紅

角黍

紅絲繫綠蔓金糝沃香錫風雨羅江上家家祭屈平

艾虎

踞戶欲生風當門勢自雄未能離草莽亦是駭兒童

蒲觴

蒲葉復蒲根香瓊泛綠樽亂離誰引壽聊欲奠湘魂

鬪草

珠玉賭牙籤爭奇手自拈一籌矜獨勝袖有謝公髯

射柳

弓滿馬如飛沙平見柳枝雋功收一鏃多是養由基

擊毬

低昂一點紅忽起青雲上風急下來遲衆人齊面仰

競渡

船頭花帽欹船尾花袍舞江神不敢行百面鼉皮鼓

書懷

朝梳髮尚玄夕鑑髻已斑欣戚苟異懷妍悴即改顏

聞析

孤館月如霜閣閣鳴秋柝羌兵未解圍淚逐寒聲落

不寐有懷

鵲寒栖未定裊裊風吹竹孤燈不厭貧斜照畸魂宿

聞鴈

天寒霜月苦人遠秋衣綻獨坐聽長夜燈前一鴈鴈

夢歸

夢歸片時歡夢覺終夜惡欲起就殘燈鼠搖寒燼落

燈花

遠人無喜報何事有燈花莫是閨中說姑傍伴緝麻

憶母

齒落髻髮鬢新年九十三寸心猶未報一飯豈能堪

憶子

未知索果啼已解迎人抱平生舐犢心時時背燈笑

憶弟

青州信息稀八桂音書絕思君無奈愁拭目都成血

上書乞歸養

陳情欲上書意切辭語促復恐大官嗔燈前再三讀

志喜

咫尺近天顏殊恩得賜環滿沽彭澤酒歡飲看廬山

對江望山

朝看江上山暮看江上山山色信不改江流幾時還

陪方員外省花

步屨到花陰花疎更繞林留連今日意不是少年心

夜坐

牕寒雪亂飛鴈帶邊聲過對影却增愁吹燈暗中坐

示楊水西

親遠更家貧將歸未有因相逢難說與君是故鄉人

逢故奴 二首

出門逢故奴倉卒塵中拜不暇相隨行街頭捧衣賣

其二

出門逢故奴怪我顏危槁茲事何足驚別離容易老

雜詠 十畫

芙蕖

紅衣寒未脫綠蓋晴猶卷楚女棹歌回遙遙秋江晚

萱草

牕間宜男花本是忘憂草
釵頭誰倒簪錢唐蘇小小

夜落金錢

朝開金錢小夜開金錢薄
青閨卜遠人銀燈花共落

蘭

蘭葉弄秋暉蘭花帶露晞
若將紉作佩相稱芰荷衣

山茶

細簇蜂脾蠟深栽鶴頂砂
雪中誰共賞一樹玉梅花

牡丹

當時姚家黃花面濶一尺惆悵洛陽人而今多未識

木芙蓉

江寒浦溆多舉目皆衰草惟有拒霜花遙遙隔江好

孔雀

掉尾立花陰參差萬點金年年蕃國進不是孔家禽

蛺蝶

衣薰細細香鬚染盈盈露特地一雙飛花間惹人妬

蜂

結房山中樹暮歸香滿腹微物詎可輕箴遲能藏毒

白門逢別王之常

二首

一自吳中別于今已十年客邊喜相見風雨白門前

其二

沽取白門酒醉別鳴臯雲君我標仕逸暢樂從此分

長沙雜詠

十首

花深衆禽寂格格啼山鷓鴣響一燈來人歸碧湘夜

其二

融融綠烟暖夢遶蘭苔外時倩鳥呼醒花濃春自醉

其三

東風吹小雨一夜滿滿湘明月鷗波裏蘼蕪各自長

其四

高樹蘿垂屈低垣竹掩花門前烟渚濶春水又沈沙

其五

網得湘中魚穿向湘邊柳一逕入花陰來換長沙酒

其六

寒沙竹塢深細雨烟江渺不聽野鶯啼那知是春曉

其七

密瓦栽斑竹疎籬種紫荊日斜墟市散時有虎經行

其八

筠嶼烟長碧蘭坡水自香只宜行畫裏忘却在瀟湘

其九

湘人愛樓居斜枕湘江起樓下倚闌人簪花照春水

其十

柳色帶輕顰
桃花露淺唇
異鄉寒食近
能得幾多春

闕

欽定四庫全書

眉
卷十

六言絕句

內律一首附

即景

四首

長眉短眉柳葉深
色淺色桃花小
橋小店沽酒新
火新烟煮茶

其二

今年去年酒債三月兩月春愁
看山看水出郭聽雨聽風倚樓

其三

東家西家燕飛明日後日春歸多愁多病送客無酒無
錢典衣

其四

桃花杏花紅白蒲葉芷葉參差飛高飛下蝴蝶行去行
來鷺鷥

小景
二首

白雲浩浩秋色碧
礪冷冷雨聲坐得松陰過
石先生酒醒詩成

其二

雨雨風風路迷斷橋流水平堤出門苔徑泥滑喚取扁舟過溪

初歸吳中感事

附郭好山遠近近城流水西東人哭人歌夜月花開花落春風

赤山閒居

二首

荷鋪遶籬栽菊解衣石上觀松甘分簞食瓢飲底須千

駟萬鍾

其二

抱膝長吟梁父折腰寧愧鄉兒酒呼白墮朝飲米雜雕

胡晚炊

遊靈巖懷古

靈巖吳城西山名也舊為吳王夫差離宮名館娃者在焉今琴臺西施洞響屨廊採香徑八角井皆其遺跡尚存

塵埋洞裏金蓮誰調臺上朱絃
屨廊春盡花落香徑雲
深鹿眠扶目臣亡此處捧心人
去何年莫洗館娃遺恥
山頂空流石泉

濯清亭

二首

半江落日高樹兩岸清風
短莎莫怪滄浪水濁邇來濯
足人多

其二

我濯塵纓水潄君垂雙足清陰
自是秋江清濁滄浪孺

子何心

天心水面亭

二首

海天萬里遙碧水一池鑑空莫問鳶飛魚躍看他明月清風

其二

動中消息春到靜裏工夫夜深三十六宮春意不道水面天心

畫

三首

芙蓉江上秋色楊柳堤邊月明莫教西軒種竹客中無
奈秋聲

其二

五株樹下待月三板橋頭賦詩童子不知人意棹歌却
怪歸遲


其三

一箇茅亭晚渡數聲啼鳥秋林愛他湖上山色立盡溪
頭樹陰

自嘆

白髮慈親九十紅塵客路三千歸去桃花源裏綵衣萱

草堂前



眉菴集卷十

欽定四庫全書

集部

眉菴集卷十一

詳校官庶吉士_臣李傳熊

中書_臣劉源溥覆勘

總校官知縣_臣楊懋珩

校對官編修_臣莫瞻菴

謄錄監生_臣范從理

欽定四庫全書

眉菴集卷十一

明楊基撰

七言絕句

天平山中

予家赤山相去不五里許

細雨茸茸濕棟花
南風樹樹熟枇杷
徐行不記山深淺
一路鶯啼送到家

寒食有感 二首

亂裏情懷怕寒食強拈卮酒竟無懽晚來一陣東風雨
吹得梨花不奈看

其二

漠漠輕陰接遠天離離芳草鎖春烟郭西多少新墳墓
若箇能來掛紙錢

過隣家撥悶

亂來情思倦看花間却西園小小車今日偶因題竹去
試扶藜杖到東家

憶均珣二弟在遠

三首

別來芳草遍天涯
憶汝飄零何處家
一向春愁禁不得
晚風吹破紫荊花

其二

一雙鴻雁隔天飛
三月江南未解圍
惆悵夜來風雨裏
片時春夢見渠歸

其三

兄愁弟戚兩相親
還復江濱定海濱
却恐數州消息異

懶將踪跡問行人

稱稱初度

我年六六髮如絲見汝三齡却兩暮願得汝長并我老
太平還說亂離時

回文 二首

烏啼夢裏燈添恨月轉屏前影對愁枯葉亂飛霜砌冷
細烟香遶夜牕幽

其二

秋涼晚殿水蕉紅扇掩閒情舊感空樓對遠霞殘照落
愁邊寄信有歸鴻

畫 三首

石上風來吹酒醒白雲幽繞綠苔生山中莫道無絲竹
聽徹松聲與磬聲

其二

葉葉衣裳帶雨裁白鷗江水淨無埃偶然扶杖沙邊立
不為看山獨自來

其三

幽蘿灌水陰清溪水鳥忘情自在啼正好從容看山色
淡烟衰草夕陽低

紅綠蕉二仕女圖

兩樹紅蕉隔禁扉曉涼携伴試羅衣金鈴小犬迎人吠
應怪秋來出院稀

其二

為折芙蓉向御溝碧羅衣薄又驚秋侍兒剛道新涼好

不解芭蕉與扇愁

夢遊西湖

採蓮女郎蓮花腮藕絲衣輕難剪裁
瞥然一見唱歌去
荷葉滿湖風雨來

燈夕微雨

脉脉輕陰潤玉笙
霏霏小雨濕銀箏
雖教月色朦朧黑
更覺燈光分外明

紅梅

一般香影月朦朧只有仙肌迥不同天不念貧空付色
儘教消瘦却教紅

水仙

冰肌玉骨照江波瑟瑟塵生襪底羅自是仙魂招不得
滿天風雨夜如何

十二紅圖

何處飛來十二紅萬年枝上立東風楚王宮殿皆零落
說盡春愁暮雨中

柳枝詞

千枝萬縷軟婆娑
倩得東風著雨按
昨夜鶯黃變新綠
比郎衫色不爭多

故山春日

八首

千花萬萼委塵埃
只有荼蘼獨自開
應是隣家更零落
過牆蝴蝶又飛來

其二

梨花兩枝春可憐
下馬折花山逕邊
山中人家改新火

隔樹吹來榆柳烟

其三

青青蘆笋襍蒲芽
細細浮萍是柳花
昨日臨池看科斗
曉來風雨已聞蛙

其四

桑葉陰陰戴勝飛
采桑人執懿筐歸
老夫欲買新絲染
製取斑斕五色衣

其五

寂寂青山一鳥啼
紫藤花落午風微
不知刻漏長多少
但覺桐陰半日移

其六

輕寒拂拂雨沈沈
紅漸蕭疎綠未陰
不是牕前兩啼鳥
錯將時序比秋深

其七

春來芳草踏成蹊
半是車輪半馬蹄
多謝清明三日雨
舊痕新綠一般齊

其八

陌上誰尋雨後花
山中人摘雨前茶
陰陰樹木青青草
可是王家與謝家

雨中對杏花

杏花枝上雨冥濛
洗得胭脂淡淡紅
寄語東君莫相妬
放教春色十分濃

壺中碧桃先謝折梨花一枝補之

一枝紅在一枝空
底事冰肌不耐風
更折梨花來作伴

玉環飛燕本相同

花時感事

為怪春寒起較遲
卧憑啼鳥報春期
近來鶯燕渾無語
過却梅花總不知

雨中對花

四首

正好看花却醉吟
醒時花事已傷心
西園數朶開將盡
風雨相看到夜深

其二

春風幾日雨淹淹
鶯慘花愁總不堪
惆悵隋堤千樹柳
至今青眼望江南

其三

消得吟風却避風
已開微淡半開濃
要知有色還無色
莫愛深紅暎淺紅

春半

薺葉深能沒乳鴉
石泉清可見魚蝦
一年春事餘多少
只有南風棟子花

春暮西園雜興

四首

疎疎簾影漾微波
庭戶無人鳥自過
一樹楊花三日雨
池塘春水綠萍多

其二

綠蕪春水燕雙飛
細雨輕寒稱袷衣
半日不來池上立
殘花又比午前稀

其三

蒲葉初長蕙葉齊
杏花如雪浣春泥
無人搖動秋千索

黃鳥飛來架上啼

其四

野棠飛盡木香開
蝶靜蜂稀逕有苔
正是江村寒食後
老夫先為綠陰來

落花嘆

半隨流水半莓苔
只有沾泥更可哀
燕子也能知愛惜
為人銜入綉簾來

三月晦日

花飛一片即春歸況是陰陰綠滿枝謾道東風有今夜
不知春已去多時

仕女四春圖

東風剪剪入妝臺眉蹙春愁掃不開非是薄羅能耐冷
捲簾貪看燕雙來

右春陰

其二

隔簾鸚鵡解呼名花落閒庭草自生曲曲畫闌皆倚遍
一春刀剪不聞聲

右春悶

其三

風送楊花滿綉床飛來紫燕亦雙雙閒情正在停針處
笑嚼殘絨唾碧牕

右春綉

其四

蹴罷秋千日已沈東風花底力難禁笑攜女伴歸來晚
失却羅鞋不再尋

右春倦

衍斯道上人折梳子花見遺走筆奉謝

五月鄉林簷蔔開雪花如掌照青苔不教天女輕分去

却為維摩遠送來

屋後種松

屋後荒蕪地五弓自除瓦礫種青松
朝來未見蕭蕭葉便覺吟詩錯費工

松下

小簾疎簾曲水濱葛衣蒲扇紫荷巾
自慙不及雙松樹猶有清陰蔽路人

寢齋見螢火

雨館蕭條已罷吟
流螢穿隙自相尋
也應憐我無燈燭
故入紗帷照夜深

看蜘蛛補網

風雨蛛絲斷不收
密經細緯更綢繆
自憐辛苦纔盈尺
多少飛虫網外遊

粉團兒花

小小流蘇結素羅
團團香粉綴柔柯
玉奴不識傷心恨
滿面春風笑靨多

見紫薇有感

埜水荒垣兩樹紅
猩袍爛漫照西風
無人種近絲綸閣
花落花開暮雨中

蓮渚泛舟 二首

冰漿不用蔗漿調
聞得荷香酒自消
一派江聲滿船月
却愁容易度今宵

其二

玉簫低與玉笙調
度未成腔意已消
雪白芙蓉香一色

總教人不愛春宵

避暑貽美人 二首

綠荷瀉酒勝瑤漿白葛含風壓串香不待瓊樓高百尺

玉人相對自清涼

其二

酥凝酪粉煉霞觴衣染浮絲碧藕香試下瑤堦看明月

玉膚消得幾多涼

夏日

聽徹簫韶獨掩扉
水花向夕斂紅衣
舞衫不用鴛鴦縠
別染春絲上錦機

赤山漫興

松梢吹粉落衣裳
躑躅花開竹筍長
可是山中朝洗藥
一渠春水茯苓香

過鄧尉山訪徐良夫留別

二首

隨意扶筇入遠林
紫藤花落逕苔深
山中莫道無音樂
一片鶯聲在綠陰

其二

浮雲載山山欲動
春水煮茶消午夢
綠蘋風起恰開帆
數聲啼鳥來相送

管夫人墨竹

霧鬢雲鬟洛浦神
冰肌玉骨衛夫人都將松雪齋中意
偏寫瀟湘雨外真

趙仲穆墨蘭

二首

當年曾進福州蘭
小殿秋風翠珮寒
零落楚香收不得

且從魏國畫中省

其二

繁露幽香泣翠娥
冷雲纖月淡秋河
沅湘一帶皆春色
誰道懷王廟裏多

白描芍藥圖錢選作

玉樓寒擁翠羅衾
珠箔晴搖縷縷金
蝴蝶亂飛花未落
東風庭院又春深

睡起圖

月圓團扇送輕涼荷大如錢作藕香午夢醒來思白雪
玉甌催進荔枝漿

張仲敏鉤勒竹

解珮歸來月影孤秋風驚鶴自相呼先生晚種參差玉
招得林間兩鳳雛

藍采和像

石崇步障四十里猗頻珊瑚八百株寧可黃金堆下死
街頭不散一青蚨

贈胡校理文伯

南郭先生一尺鬚
秋風欲別意踟蹰
明朝歸看庭前杏
添得清明幾百株

贈薛如鑑

善相

二陸門前一見君
笑談許我到青雲
平生不學縱橫術
那得黃金鑄印文

寄無錫張彥禎

老去張堪更愛農
不教稅務及疲癯
如今麥熟蠶成箔

處處桑麻百二弓

寄陳惟寅惟允

坐有重氈食有魚
眼能識字手能書
山於秋水船頭看
家在春波門外居

松陵道中

吳姬盪槳出蘋花
江上行人未到家
日晚城邊秋侶水
萋萋烟樹亂鳴鴉

青山白雲圖

手種溪頭十畝陰
鳥啼花落暮雲深
夜來一尺蘭苔雨
若箇扁舟肯見尋

宿雲竹居

月斜風細酒微醺
白露瀼瀼濕練裙
底事夜深清不寐
半窓竹影半牕雲

題畫

暮靄霏霏掩翠峰
遶籬落葉有行蹤
杖藜獨自行吟去
不是尋僧定看松

四皓

高帝如何太子盈先生垂老入京城當時四皓非黃綺
多是留侯指教成

煩李伯定移菊

何處籬邊菊本多煩君將送綠婆婆老夫準擬重陽醉
亂折黃花插皂羅

九月八日對菊

去年風雨罷登高今日黃花預見招莫怪籬籬開未好

正含秋色待明朝

題趙松雪臨宋徽宗水墨草蟲

趙自題云不暇丹青筆何人寫遠愁露濃時菊晚風
緊候蟲秋元末諸作者不知公意反有所誚走不揣
次韻用以慰之云

王孫老去尚風流畫裏新詩寫淡愁莫道吳宮與梁苑
露蛩烟草一般秋

二美人圖

半餉無言却斂眉玉簪斜墮翠鬟歌相逢莫說傷心事
才入深宮自得知

其二

鴉頭羅襪鳳頭鞋細踏花陰下玉堦綰得青絲無奈滑
更臨春水照金釵

刺綉倦綉二圖

兩日無心綉一絲偶將針線刺花枝無端綉到雙蝴蝶
憶著西牕夜雨時

其二

刺得芙蓉半朵金
倚床無語自沈吟
玉奴不解傷心意
抵死相催綉幾針

附唐處敬和

洗花染線刺春羅
鳳翼雙飛錦作窩
慙起非關針力
倦海棠時節困偏多

附高季迪和

翠絲盤葉碧玲瓏
小萼花鋪茜縷紅
夢裏鴛鴦留不

得分明却在綉床中

為孟辨題二仕女

紅綃衫子雪膚肌女伴相邀去賭碁花底忽逢雙蛺蝶

背藏羅扇看多時

右觀蝶

其二

玉奴催報海棠開及早梳頭出鏡臺便揀一枝和露折

六宮惟我最先來

右折花

白練二圖

戟尾參差白練分
馬嵬坡下舊香魂
君王西去無消息

疎雨桃花半掩門

右碧桃

其二

珍禽斜立海棠枝
玉雪胭脂看欲迷
只恐驚飛花亂落
霓裳三拍按教低

右海棠

代贈所懽

三首

濃綠蛾眉淺淡妝
玉肌紅暎白霓裳
春風不稱花枝願
逢著多情即斷腸

其二

衆中相見獨相憐憐我多情更有緣
不是無心看春色
亂離情緒不如前

其三

寬盡羅衣兩鬢秋相逢猶自愛風流
天涯無復陽臺夢
辜負春風萬種愁

枇杷青鳥

枇杷香遶漢宮栽珠箔銀屏四面開
武帝遣書邀阿母

青衣使者最先來

遇史克敬詢故園

克敬自長洲來因詢吳中風景大異往昔賦此以寓
鄉里之思云

三年身不到姑蘇見說城邊柳半枯縱有蕭蕭幾株在
也應啼殺樹頭烏

贈京妓宜時秀

欲唱清歌却掩襟晚風亭子落花深坐中年少休輕聽

此曲先皇有賜金

出金陵城南

二首

長干塔前千樹花半隨流水半泥沙
王孫醉裏渾忘却走馬麤豪來索茶

其二

去盡黃鸝綠樹陰閒門重掩落花深
當時一曲尊前酒多少王孫買笑金

憶挹翠亭聽歌示徐幼文余唐卿

清歌一曲動梁塵只憶當時淚滿巾
何況春歸花落盡眼前漂泊兩三人

江寧雨中

解盡春水水漸通岸花狼藉燕西東
巴江不盡青青草都在疎烟淡雨中

江村漫興

三首

江籬葉長三月春江邊柳花飛接人
吳姬壓酒醉十日及此東風綠髮新

其二

一月春陰不省山夢魂長在碧雲間美人別後綠詩瘦
白玉腰圍一尺慳

其三

莫道書生未白顛鷓鴣聲裏自年年祇因落盡牆頭杏
幾日琵琶不上絃

重到京

杏花村裏清明酒陽羨山中穀雨茶如此情懷如此景

行人何事不思家

春盡聞鶯有懷高季迪

一聲黃鳥喚愁醒
已是南風綠滿庭
客裏得聞休恨晚
故園知有幾人聽

從袁贊府乞珉玉巾環

新製東坡一幅巾
也堪漉酒障埃塵
更須乞取雙環玉
相稱山人兩鬢銀

夢故人高季迪

三首

辛亥八月十八夜夢與季迪論詩已而各出詩藁互
相商確季迪在吳時每得一詩必走以見示得意處
輒自說不已夢中抵掌故態如常時因賦三絕季迪
且索其舊作云

詩社當年共頡頏我才慚不似君長可應句好無人識
夢裏相尋與較量

其二

老來久不誦君詩得見都忘是夢時我最憐君君識我

此中未許俗人知

其三

驚人新句嘆無前
故態疎狂侶少年
便寫錦囊三百首
為君披咏步涼天

秋夜

秋風今夜十分涼
斜月欺人巧照床
自是不眠思往事
漏聲元只許多長

江邊見紅葉

一瓣霜紅一瓣秋上陽宮裏御街頭而今漂泊寒江上
相趁蘆花細細流

客中懷弟妹

弟妹當年五六人銀鞍羅綺照青春而今死別兼生別
風雨瀟瀟一病身

沙河聽雨

壬子閏七月十四夜

惡雨乖風聽未休暗愁悲續斷鴻秋却將湖海三年夢
併作沙河一夜愁

舟中書所見 二首

羅帕包頭不畫眉
沙河船裏鬱金衣
可應憶著關心事
斜倚秋風省雁飛

其二

玉膚花貌是誰家
趁逐秋風渡晚沙
河水東流燕西去
一般魂夢遶天涯

舟中聞絡緯

江濶天空北斗低
月寒沙白露淒淒
家鄉漸遠衣裳薄

憑仗秋蛩莫夜啼

客中憶弟

去時霜葉遶溪紅
落盡桃花信未通
客裏匆匆寒食酒
一樽那得弟兄同

夢稱稱 二首

語未能真已誦詩
相過爭愛骨權奇
他鄉夢裏分明見
猶似當年索果時

其二

掌上明珠落大淵夢中愁對玉娟娟我將四十空回顧
念有何人與我玄

過琵琶亭

在彭澤

楓葉蘆花兩鬢霜櫻桃楊柳久相忘當時莫怪青衫濕
不是琵琶也斷腸

詠大姑山下梅花

紫萼黃鬚抱玉膚也應人惜半枝枯雪中惟有山僧折
瓦缶寒泉薦大姑

出江省廬山

一疊峰巒一道泉，幾重雲樹幾重烟。
歸來記取屏風樣，寫向茅齋聽雨眠。

雨晴廬山省雲

橫帶斜烟抹翠蛾，淡籠初日照青螺。
行人謾道廬山好，自是春雲態度多。

省廬山時無片雲

消盡春雲山更宜，芙蓉全見碧參差。
天然標格誰能似，

號國夫人淡畫眉

舟泊南湖有懷

三首

二月十二日舟泊彭蠡南湖嘴風雨甚寒憶吳中是
日郡人皆試夾紗衣單羅扇往范家園看杏花入春
來此為行樂之首

紗衣羅扇一時裁兩兩三三作伴來正是吳中好風景
范家園裏杏花開

其二

單羅小扇夾紗衣冠子梳頭插翠微知是范家園裡醉
無人不戴杏花歸

其三

日日看花載酒行不論時節與陰晴相逢猶自嫌春色
花裏迎人問太平

途中為人題畫

溪水涵秋帶綠蕪草堂雲冷鶴將雛相逢未遂還山約
空復年來省畫圖

江西送陳文獻薛存道二生還山西

三首

江上憐君踏雨來推蓬一笑兩眉開
莫教章句孤年少自古山西出將才

其二

滕王閣下說山西多少雲山望轉迷
問我路程嗟更遠桂林烟雨鷓鴣啼

其三

君歸晉翼我湘潭塵土風波兩不堪
盡道衡陽有迴雁

行人更在雁西南

到江西省對花

八首

閒來樹底踏青莎
喜見斜紅插皂羅
莫愛壓枝千萬朵
三花兩蕊更情多

其二

長恨花開春色闌
不堪春半百花殘
從今却願遲開落
得向清明節裏看

其三

芳草無端出意長
斷紅殘綠弄春陽
莫愁寒食花開盡
更有荼蘼與木香

其四

最好花枝最後開
千重妝束萬重栽
東風不敢輕吹破
前度劉郎恐再來

其五

青絲茵褥是柔莎
白苧衣裳勝綺羅
千樹桃花紅一色
春光誰道不須多

其六

小小旗亭曲曲闌禁烟時節未鶯殘便須連夜燒銀燭
莫待他年霧裏看

其七

東湖東畔柳枝長滿苑飛花亂夕陽何處被除兒女散
過來流水鬱金香

其八

生色屏風一面開輕羅團扇合歡裁深深院落青青柳

縱是無花也看來

後四首次前韻

題方員外像

一尺長鬚七尺身當時顏色畫能真相看已覺如兄弟
不待他年是別人

雜畫

六首

玉梳糖霜萬顆冰王孫筵上酒微醒若教畫作回仙鶴
一夜吹簫過洞庭

右石榴

其二

盧橘當年出漢家
誰將名字雜枇杷
風枝露葉金盤果
盡是僧房雪後花

右枇杷

其三

一斛涼州價已多
上林千樹酒成河
塵沙漠漠穹廬雪
若箇銀瓶覆紫駝

右蒲萄

其四

茂陵老去愛求仙
青鳥銜書到御前
不意種桃成一笑
開花結子六千年

右緋桃

其五

密辦深紅別有春
武陵千樹欲迷津
不因流水漂香出

那得秦人識晉人

右千葉緋桃

其六

沈香亭北繞闌栽
曾藉花奴羯鼓催
今夜不須銀燭照

待他明月上枝來

右海棠

其七

淨洗胭脂學道裝
玉冠青帔羽衣裳
蕊珠宮裏秋宵永

立盡瑤堦一夜霜

右蜀葵

其八

紫袍紅刺玉纖纖
甘露收香入翠奩
何處南風開滿架

綠陰庭院水晶簾

右薔薇

聞鵲

鵲鵲船頭喚夢回
鵲聲雖好却成哀
昇州一望三千里
那得音書送喜來

過黃州吊赤壁

風雨來登赤壁磯武昌烟柳望中稀無人更有坡仙樂
月小山高醉未歸

舟中見雪珠

鮫人捧淚泣春風亂擲明珠向短篷欲采綠莎紉作佩
滿江春水落花紅

鯉魚山阻風天甚寒雨皆成霰

江南天氣太無憑草色烟光暖欲蒸向晚鯉魚風乍急
盡吹小雨作春冰

夏口

川江東接漢江流萬里相逢鸚鵡洲
更約瀟湘與沅澧
大家淘盡古今愁

望武昌

吹面風來杜若香
離離烟柳拂鷗長
人家鸚鵡洲邊住
一向開門對漢陽

其二

春風吹雨濕衣裾
綠水紅妝畫不如
却是漢陽川上女

過江來買武昌魚

德安山中

石橋斜日萬山陰
雲滿寒溪雪滿林
獨有梅花看不厭
江南春色故園心

岳陽阻風

三湘風雨五湖春
萬里相思一病身
能向此中魂不斷
更無愁處可愁人

過洞庭口號

七十二峰天際開一泓秋水大於盃
白鷗千點飛不盡
鴻雁一雙何處來

湘江對雨

二首

風雨黃陵半掩門
鷓鴣聲裡樹微昏
無情最是江邊竹
猶自淋漓有淚痕

其二

渺渺滄波淡淡鷗
綠蒲青葦響如秋
人生不聽瀟湘雨
行遍江湖未是愁

題楚江秋意圖

萬里巴江入海流水天空濶雁行秋楚歌未斷西風起
一段青山一段愁

經汨羅廟在湘陰縣北六十里

三閭祠宇汨羅邨重午年年一掃門莫道獨清當日事
至今湘水不曾渾

和陽道中

五首

疎烟小雨濕流光愁得楊花不暇狂半餉春晴便飄蕩

綴人簾幙上人床

其二

愁紅怨白滿江濱一樹盈盈恰破春正是情多開自晚
雨中知有斷腸人

其三

曲垣低檻是誰家門戶深深閉落花千百黃鸝萬竿竹
夢魂應不到天涯

其四

一簇茶蘼湘水東
輕輕脂粉趁微風
低嘖淺笑皆傾國
不在胭脂著意紅

其五

紅深翠密不成蹊
修竹玲瓏巧更低
黃鳥未知花又落
野棠風裏一雙啼

潭州雜懷

九首

春江瀰漫春草亂
一色遙遙青不斷
晚來烟起鷓鴣飛
無數桃花在東岸

其二

鳩鵲鷓鴣飛滿沙
綠水刺刺上蒲芽
湘潭縣裏春分後
不道人家有杏花

其三

渡頭烟柳入村稀
沙嘴漁舟各自歸
却笑匆匆雙白鳥
滿江風雨不停飛

其四

桃花深紅杏花白
紅白花開弄春色
東風一片落衣裾

腸斷江南未歸客

其五

船頭漱齒濕衣裳
水面花飛口亦香
坐愛蜻蜓兼蛺蝶
闌將春色上牙樁

其六

午睡醒來風滿面
十年春夢思量遍
前度劉郎觀裏花
舊時王謝堂前燕

其七

吳女娉婷楚腰舞梁園風雪瀟湘雨多情長使鳥催歸
底事不教花解語

其八

楚妃祠前花繞樓楚人唱歌牽客愁全開一樹紫含笑
閒聽數聲黃栗留

其九

湘中老翁不裹巾見我自是平生親衡陽萬里雁不到
爲問使君何處人

舟回看廬山

雲中西去雨中還又見秋雲黯淡間不是漂零應不得
一年三度看廬山

望五老峰次權宣使韻

宣使權仲武有送余詩曰五老騎雲來送迎八月廿
四日雨中過湖望五老在烟雲中若欲與余笑語者
因用仲武韻為起句

五老騎雲來送迎笑余舟楫往來輕前身曾住東林寺

因與廬山有舊盟

其二

五老騎雲來送迎
迎君却是送君行
從今卧聽鍾陵雨
誰與廬山愛晚晴

送李都司往江西簡省中諸友

時寓茆山

秋屏閣下雨新晴
無限匆匆別我情
不意長干秋色裡
又將詩句送君行

其二

我從西省罷官歸旋葺茆茨近翠微從此生涯是鉏耰
故人休怪寄書遲

其三

左掖桃花向北栽兩番風雨見花開明年對酒應齊說
曾與眉菴共看來

嘆道傍廢宅

桑柘陰陰遶岸栽石闌銷折卧蒼苔欲求姓氏無人識
時有逃軍剝棗來

觀剝棗

珠實離離雨更新
行人敲剝走荆榛
我來不忍臨風食
為憶當年種樹人

重過文竹軒

二首

蕭蕭茅宇曲岡西
嗟我重來路已迷
何事隣翁猶愛惜
壁間留得醉中題

其二

倏來還去已堪悲
况復難期再到時
疎柳最多離別意

十分憔悴向人垂

送陳明善之真定

風塵贏得髭毛斑
不為臨歧一愴顏
五日北風三尺雪
馬頭遙見太行山

過下蔡

當時佳麗比陽城
楚女腰肢雪鬪輕
莫怪王孫迷一笑
古來尤物萬人傾

過竇鳴犢大夫祠

生死齊君有舜華西來尼父竟同車荒祠人去槐陰靜
一院南風芍藥花

梁園聞雁有感

萬里飛來一雁聲梁園枕上夢初醒誰憐今夜江南月
又是空齋獨自聽

其二

空齋獨自數長更聽得嘹嘹一雁聲忘却江南與江北
斷腸同是客中情

其三

斷腸何處最堪憐
客裏逢秋憶去年
安得妻孥與兄弟
舉家歡笑雁聲前

登宋宮故基

上皇宮殿碧參差
嗟我來登見廢基
盡道河邊金線柳
腰肢猶似李師師

太行望雲為新民賦

十年漂泊向風塵
一度看雲一愴神
此日逢君重惆悵

異鄉多少望雲人

其二

晉冀封疆萬里長
白雲飛處是他鄉
愁心恨不如春雪
一夜東風到太行

到山西題畫梅

江南分手到山西
每憶溪橋夢不迷
冰雪有如林下約
一枝重向畫中題

太原官廨見榴花

短短榴花石上栽
南風吹得一枝開
花枝縱是相憐我
白髮何心為看來

罷釣圖為翟少叅文光題

時翟將休致故及之

畏途萬里費經遊
到處紅塵沒馬頭
何日釣竿從此老
也分一片荻花秋

觀晉祠泉

在太原縣流出為汾河者

太行翠色鬱蟠蟠
一派泉飛石罅寒
千古東流誰禦得
任歸滄海起波瀾

曉度雁門

關山迢遞朔雲高
風緊霜華積毳袍
此地宣威稱李牧
有誰再退北羌豪

除夜

舊歷驚心只一行
坐依燈火戀年光
尋常客裏愁長夜
惟有今宵願更長

眉菴集卷十一

欽定四庫全書

眉菴集卷十二

明 楊基 撰

詞

江寧春館寫懷

清平樂四闋

春水消後綠水粼粼皺減却風流添却瘦多在黃昏時
候匆匆商女琵琶蕭蕭白髮烏紗金谷園中芳草玄都
觀裏桃花

其二

自從別後眉也尋常皺瘦得腰肢無可瘦又是魂銷時
候當時纖手琵琶東風小雨窓紗今夜相思何處明月
滿樹梨花

其三

梅酸杏小人與春俱老一架茶蘼開遍了能得歡娛多
少陰陰綠樹青苔都無半點塵埃寄語此中猿鶴先生
早晚歸來

其四

狂歌醉舞俯仰成
今古白髮蕭蕭纔幾縷
聽遍江南春雨
歸來茆屋三間
桃花流水潺潺
莫向牕前種竹先生
要省西山

春思

多麗

問鶯花底事
蕭索是東風
釀成細雨
晚來吹滿樓閣
辟寒金再替寶髻鎮
惟屏重護香幄
杏惜生紅
桃緘淺碧
向人憔悴未開
一萼
念惟有淡黃楊柳
搖曳珠箔
憑闌

久春鴻去盡錦字誰托
奈夢裏清歌妙舞覺來偏更
情惡聽高樓數聲羌笛管多少殘夢梅花驚落鴛鴦帶慵
寬鳳鞋懶綉新晴誰與共行樂料應在楚雲湘水深處
望黃鶴不似柳花長任恁漂泊

春水

沁園春

巴蜀雪消湘漢冰融淨無片埃
看風吹皺綠晴涵杜若
雨添香膩暖浸莓苔
江漲魚鱗溪沈燕尾
贏得沙鷗宿
鷺猜花陰下見行人待渡芳意徘徊
湖邊十二樓臺

映多少朱簾影倒開愛綠醅可染蒲萄新釀麴塵低蘸
楊柳初栽修禊人歸浣紗女去猶有餘香拂岸來多情
處汎桃花無數流出天台

折柳

清平樂

欺烟困雨拂拂愁千縷曾把腰肢羞舞女贏得輕盈如
許猶寒未暖時光將昏漸曉池塘記取春來楊柳風
流正在輕黃

四春圖四景美人各賦浣溪沙一闋

雲母玲瓏七寶屏玻璃潋灩百花棚笙簫羅綺一層層
信手摘將金荔擲教人扶下綵車行六街明月萬家
燈

右元夕

其二

鸞股先尋鬪草釵鳳頭新繡踏青鞋衣裳宮樣不須裁
雕玉疊成鸚鵡架泥金鑄就牡丹牌明朝相約看花
來

右花朝

其三

軟翠冠兒簇海棠
研羅衫子綉丁香
閒來水上踏春陽
風暖有人能作伴
日長無事可思量
水流花落任忽忙

右上已

其四

暖雨香雲百五天
玉纖銀甲十三絃
笑移羅幙上紅船
照水再簪珠絡索
背人重貼翠團圓
安排花裏蹴秋千

右寒食

梨花夜月

菩薩蠻



水晶簾外娟娟月梨花枝上層層雪花月兩模糊隔簾
看欲無月華今夜黑全見梨花白花也笑姮娥讓他
春色多

瓶中四花瓶插梨杏桃李各一枝

踏莎行

小小含風盈盈帶露折來全向銀瓶貯朱唇偏耐雪霜
寒冰肌不受胭脂污瘦燕休矜肥環莫妬東君一樣憐
蜜素若教淺淡笑深濃大家都被嬋娟誤

春閨怨

蝶戀花二闋

淨洗胭脂輕掃黛鬪草亭邊自拗梨花戴一段心情空
自愛風流那得常時在屈指春光歸已快不捲朱簾
又恐東風怪花影低將新月碍小闌干外深深拜

其二

新製羅衣珠絡縫消瘦肌膚欲試猶嫌重莫信鵲聲相
侮弄燈花幾度成春夢風雨又將花斷送滿地胭脂
補盡蒼苔空獨自移將萱草種金釵挽得花枝動

春恨

千秋歲

柳花飛盡魚鳥無音信
盃減量愁添鬢梅酸心未老藕
斷絲猶嫩歡笑地轉頭都做江淹恨
香冷灰銷印燈
暗煤生暈空自解誰俦問
夜長春夢短人遠天涯近
庭院晚一簾風雨寒成陣

嘲春四詠

如夢令

昨夜雪晴風小羅幙嫩寒猶悄
天氣近花朝江上燕兒
來了催曉催曉隔樹數聲啼鳥

右春曉

其二

瞥眼韶華如織粉，退紅嬌。忽忽堪詫，是東君忙去都忘。
相識，可惜，可惜芳草謾連天碧。

右春暮

其三

點綴落梅穠李，埋沒蒼苔芳芷。樓上倚闌人，立在玉屏。
風裏風起，風起都做一江春水。

右春雪

其四

銀渚拂波輕度，羅幄送寒低護。催得百花開，又與百花
相妬。無數，無數，吹過畫闌西去。

右春風

紅白桃花

採桑子

淺碧深紅是誰家分染桃花片兩枝爭艷青粉墻頭見
深處娉婷淺更多嬌倩昭陽殿玉環飛燕各自東風
面

柳鶯燕三詠

點絳脣

裊裊婷婷為誰僂僂腰如把小桃相亞低拂前簷瓦深
處鶯藏不怕金丸打章臺下幾株如畫繫著青驄馬

其二

何處飛來柳梢一點黃金小
弄晴催曉喉舌如簧巧春
夢須臾正繞江南道空相惱
被他驚覺綠遍池塘草

其三

王謝堂前舊時簾幙深如許
自從歸去花落春無主綠
水橋邊茅屋人家雨花深處
有人相妬掌上輕盈舞

絮

憶秦娥

東風惡一江春水楊花落
楊花落惹人衫袖綴人簾幙
才飛却墜能纖弱條來還去
無拘著無拘著山遙水

遠任伊飄泊

暮春見花

踏莎行

白皺沾苔紅輕惹絮落花堆積無層數當時開折賴東風
飄零還是東風妬宿雨初晴低烟欲暮綿綿芳草
迢迢路綠陰深處聽啼鶯鶯聲更在深深處

其二

淺碧凝鬚輕紅染瓣東風著意催初綻不須抵死恨開
遲遲開却得遲遲省醉眼微醒羈魂欲斷斜陽流水

東西岸只知人有萬千愁花枝更有愁千萬

句曲閒居春暮

賀新郎

自離西江省幕謫句曲已徂春矣寓居無聊未免感
時撫事援填古詞用撥新悶云

風晴樹陰薄正簾櫳楊花飛盡楝花吹落一逕青苔無
人到翠葆時翻露穉聽樹頂長鳴孤鶴半沼香萍風約
住見新荷影裏雙魚躍多少恨頓忘却疎狂莫笑今
非昨想當時狂歌醉舞轉頭都錯內苑櫻桃纖纖手勸

薦金盤杏酪夢不到南薰池閣世事多因忙裏悞算人
生只有閒中樂且對酒任漂泊

試衣

賣花聲

風暖試輕羅簾外婆婆落花重疊滿柔莎細數輕羅衫
上淚更比花多無語却臨波低斂雙蛾玉容春色兩
消磨多少相思無限恨一葉新荷

暮春

錦堂春

芍藥闌邊按樂茶蘼屏下圍碁春光正在多情處腸斷

欲歸時 疎雨一池荷葉綠陰千樹黃鸝那些清景無人解只許自家知

送春

點絳脣

柳上梅邊那時庭院初相遇杜鵑啼處驀地拋人去

春也多情故繞江邊樹風兼雨落花飛絮併得難停住

詠鷗

南鄉子

春水綠迢迢長與鳬鷺點翠苗一向逐波浮不定飄飄又趁東風下晚潮閒倚木蘭橈相近相親不用招今

夜月明何處
覓遙遙兩岸蘆花雪未銷

江上閒居寫懷

青玉案七闋

王孫芳草生無數
漸綠遍長干路
春色匆匆愁裏度
幾番風雨幾番晴
霽又是遙山暮
青鞋不怕春泥汙
紅藥重教曲闌護
細數落花成獨步
自緣山野不堪廊廟
不是文章悞

其二

曉牕啼鳥驚春睡
侶報道春光至
測測餘寒侵繡被
梅

花飛也杏花開也燕子歸來未
水光山色如人意長
恨春陰杳無際今日新晴俱可喜
山光明媚水光溶漾
只有人憔悴

其三

鶯聲留我看山久臨去也重回首
雖是春光隨處有暖
風輕霧淡烟疎雨都在江邊柳
自知不是經綸手無
意封侯印如斗行樂何須金谷友
只消尋箇典衣伴侶
同醉金陵酒

其四

曉來一陣輕寒過水面薄冰吹破竹外錦鳩啼一箇添
黃入柳點紅歸杏都是東風做鬢絲遊颺烏巾墮醉
裏漁歌自賡和但得潮頭風不大數羣鷗鳥半篙烟雨
著我船中卧

其五

雪消天氣東風猛簾半捲猶嫌冷怪問春來長不醒一
春都是酒徒花伴醉了重相請而今白髮羞垂領靜

裏時將舊游省記得孤山堤上景一灣流水半痕新月
畫出梅花影

其六

五更風雨花如霰問春在誰庭院報道春光浮水面一
雙鷗鷺數莖芹藻無數桃花片武陵溪上東風怨空
趁漁郎再尋便拋棄已同秋後燕那知別後飄飄蕩蕩
這裏重相見

其七

平湖過雨青如鑑柳下賣花船
纜雌蝶雄蜂飛繞擔杏
花終是輕紅嫩白不比梨花淡
一春能幾花前探天
氣無憑故相賺晴不多時陰亦暫
一回風雨一回烟霧
何處堪登覽

答屠仲權見寄

如夢令

牕外月斜鷄叫門外馬嘶車鬧
多少夢中人盡被春風
吹覺休笑休笑白髮也曾年少

其二

茅屋小牕寒驟人影梅花同瘦風緊雪初晴月上一更
前後迤迤迤迤白髮青衫如舊

首夏書事

夏初臨

瘦綠添肥病紅催老園林昨夜春歸天氣清和輕羅試
著單衣雨餘門掩斜暉看翻翻乳燕交飛荷錢猶小芭
蕉漸長新竹成圍 何郎粉淡荀令香銷紫鸞夢遠青
鳥書稀新愁舊恨在他紅藥闌西猶記當時水晶簾一
架茶蘼有誰知千山杜鵑無數鶯啼

初夏閒居

浣溪紗三闋

幾卷斜封出舊窠
藕絲柔梗上新荷
衣裳輕薄試單羅
烟淡淡中青草合
雨絲絲裏綠陰多
園林佳趣是清和

其二

漸老情懷怕別離
可堪人去又春歸
斜陽流水意遲遲
春從不歸終不住
人重相見更相期
此時端的斷腸時

其三

小院回廊曲更深
一重楊柳一重陰
夜長人靜漏沈沈

補巢燕子銜將細雨香泥重做 誰向花前行過見金
蓮踪跡尚留些箇無處覓佳音贏得兩眉低護鎖茂弘
何事猶携紈扇却恐西風相汚且歸去綠樹陰中淨掃
青苔高卧

詠簾

燭影搖紅

花影重重亂紋匝地無人捲有誰惆悵立黃昏疎映宮
妝淺只有楊花得見解忽忽尋方覓便多情長在暮雨
回廊夜香庭院 曾記揚州紅樓十里東風軟腰肢半

雪白梨花千瓣玉雨黃梅子萬丸金清和天氣夏初臨

卜居

蝶戀花

人間何處宜閒住除却桃源便向瀟湘去楊柳桃花千
萬樹不須更覓深深處白鷺輕鷗為伴侶女嫁漁郎
男娶漁翁女已辦綠蓑眠細雨料應天意還相許

詠塵

望湘人

愛輕隨馬足深輾綉輪落花飛絮相和紫陌春晴東華
風暖拂拂嫩紅掀簸羅襪微生素衣曾染閒愁無那看

更薄霜輕霧江遠處但只見寒烟衰草山無數凭闌不
語恨一點飛鴻數聲柔櫓都不帶愁去當時夢空憶
邯鄲故步山陽笛裡曾賦黃金散盡英雄老莫倚善題
鸚鵡君省取且信提携如意樽前舞浮名浪許要插柳
當門種桃臨水歸老舊游路

壬子重陽感舊

念奴嬌

今年重九被閒愁孤負一番時節菊蕊青青香未吐知
我無心扳折紫蟹凝霜金橙噴霧舊事憑誰說故山何

露玉娉婷猶恨蓬山遠閒悶如今怎遣奈草色青青似
剪且教高揭放數點春一雙新燕

題隔屏仕女

醉花陰

雲母屏風金縷扇薄映春風面縱是不分明猶勝腰肢
背後恁恁見鏡裏花枝簾底燕無處尋方便莫道不
留情秋水芙蓉獨自思量遍

感秋

摸魚兒

問黃花為誰開晚青青猶繞西園秋光賴有芙蓉好那

處莫山無限紅葉遙想響屧廊西涵空閣上水與雲
相接回首十年成一夢却倚西風傷別料得明年人雖
強健雙鬢都成雪且須沽酒與君低問明月

詠雪禁體

水調歌頭

嘗愛歐陽及蘓公禁體雪詩而自古雪詞無禁體者
十月晦余歸龍江風雪連日因賦水調歌頭一曲仍
不用鹽梅玉潔皓白飛舞字

風色夜來緊寒氣十分嚴起看江上樓門無處不鈎簾

短短釣蓑漁艇小小竹籬茅舍斜挂一青帘醉眼傲今
古不飲笑陶潛 正款款俄揚揚復纖纖楚山埋沒何
在高處露雙尖人道黨家風味不比陶家清致我欲兩
相兼舉盞慶豐瑞來歲不須占

客中壽婉素

齊天樂

華鯨聲遠鶯聲早念念瑞烟籠曉蛾綠添眉蜂黃點額
樓上妝梳初了羅輕佩小向晴日簾櫳暖雲池沼細熬
名香滿斟春酒拜翁媼 繁華流水東去又梁園密雪

長干芳草楊柳東風梨花淡月幾度夢魂牽繞佳辰漸
好願此別歸來會多離少笑引兒孫故鄉稱二老

旅中感舊

喜遷鶯

烟光明滅正細雨釀寒羅衣猶怯泥沁香融波添綠膩
幹淡柳金梨雪借問遠山何事低學修眉雙結料也是
為朝朝暮暮傷人離別情切且莫問燕子未來來也
成虛設蘇小愁多秋娘老去雖把綉簾高揭回想舊時
春夢多少轉員周折但只願盡今生都是稱心時節

月夜過采石

西江月

采石磯頭明月娥眉亭上秋山古今來往幾人閒贏得
新愁無限 不用朱唇低唱何須纖手輕彈一觴一咏
到更闌驚起數行鴻雁

江船聽雨

如夢令

篷上雨聲初罷船尾綠蓑齊挂添却幾重泉都向松梢
飛下如畫如畫山與白雲齊亞

江邊落梅

千秋歲引

斷角殘鍾孤城小驛雪裏匆匆見顏色才看綠毛花底
鳳又聽黃鶴樓中笛綺窓寒綉帷晚時相憶開處漏他
春消息飄處恨他春拋擲猶自多情點衣白當時一枝
曾折寄而今數朶須憐惜小橋邊短籬外重尋覓

夜泊大姑廟下風雨無眠賦以感懷

念奴嬌

一天風雨奈無情悞我匆匆行色龍女祠前三日住可
是東君留客夢裏家山燈前兒女幾處烟波隔數莖愁
鬢看來今又添白遙想小小宮桃盈盈牆杏都被輕寒

勒只有春江如得意添却蒲萄三尺鶯燕休愁鳬鷺莫
笑行止非人力明朝西去布帆高掛晴碧

臨湘雪夜

謁金門

東風劣吹下一天春雪單薄被兒寒又怯自溫溫不熱
依舊起來周折梅影淡橫斜月清則是清清更絕欠
他相對說

巴陵雪夜

西江月

銀燭偏欺瘦影爐熏不退輕寒蘭舟聽雪楚江干蓬外

春虫撩亂 添上鬢邊白髮驚回夢裏青鸞尋常猶恨
夜漫漫今夜更長一半

岳陽春暮

念奴嬌

楚江天暖滿山桃李被東風吹忒怨白愁紅千萬點都
向溪邊流出前度劉郎去年崔護相見頭全白杜鵑啼
處要歸誰便歸得 惆悵南浦南邊東湖東畔芳草茸
茸碧寒食清明都過了回首無多春色茂苑鶯聲鷗波
烟雨同是江南客五湖春渺且聽君山吹笛

衡陽道中

洞仙歌

斜紅皺白映水花千樹獨自沈吟對雨恨黃鸝特地飛
向枝頭千百轉說盡愁人意緒 倚蓬凝望眼楚天湘
水一點君山在何處料得綺窓前人也銷魂歸期遠玉
纖頻數便寫却銀牋向衡陽倩著箇春鴻帶將回去

秋雨

湘中作

訴衷情

中年人已怕逢秋情景不相投尋常耳邊風雨都聽作
許多愁 千古事幾時休枉追求數行雁一派瀟湘獨

自登樓

湖南舟中見新燕

雙雙燕

去年別處記黃葉秋聲晚涼庭院恁恁欲去再入綉幃
留戀回首東風又軟漸細雨梨花開遍那知各自飄零
向這裏人家重見 柳外湘波似練竹籬茅舍何如玉
樓金殿呢喃聲裏如訴落紅千片一樣山遙水遠料應
也多愁多怨相期月戶雲窓依舊舞裙歌扇

湘中書所見

虞美人

巴陵樹裏湘陰路幾箇人家住門前綠水繞圍遭閒種
一株楊柳一株桃 青梅紫筍黃鷄酒又剪畦邊韭楚
聲歌罷亂簪花盡是不知音律老叟

花邊夜宿

菩薩蠻

瀟湘門外春江水小紅樓子臨江起樓下是誰家一株
含笑花 蘭舟休遠去只就花邊住花影上牙檣夢魂
今夜香

祁陽道中聞蛙

小重山

累累湘雲帶晚霞東風吹絮落晴沙夢魂今夜繞天涯
春暮也芳草亂鳴蛙獨自莫咨嗟青烟飛颺處有人
家且分新火試新茶深竹裏無數木香花

旅中春曉

二郎神

野棠風急又過了一番花信想芍藥猶香荼蘼將謝春
色恁恁欲盡自疊牋題芳字寫不就閒愁閒悶能幾度
尋思鏡中添了許多愁鬢休恨清明已過清和相近
漸藕葉初圓櫻桃紅小新竹娟娟綠嫩疎雨池塘綠陰

亭館別是一般風韻記珍簾湘簾葛巾紈扇晚涼時分

山西途中送友回鄉

阮郎歸

攜手河梁惜袂分秋雁不成羣同來不得同歸去目斷
太行雲望故里暢羈魂近楊柳闔門惟留白髮老河
汾無才可報君


初到山西纔中秋已寒甚擁弊裘矣緬思故鄉正
當賞桂問月之期杳莫可得然諸友亦多散沒惟
止仲在焉用填詞一闋寄之則鄉情旅況覽示何

如 惜餘春慢

隴頭水澁秋蟬過塞雁鳴寒威陡至恁早覺袖手懶將
開這氣候偏與中原異峭砭肌骨冽脆髭須江南老實
難當禦覽高山何葉不零那百草歸何處 記故鄉秋
暑方消金粟飄香黃花委地謾携壺共上著翠微吟盼
白雲紅樹時去世更無幾南遷北往番成夢裏到明朝
贏得邊雪霏顛空令撫髀

憶故園 長相思

山悠悠水悠悠水遠山長無盡頭
僚怎不生愁
憶歸
休合歸休春到江波漾白鷗
好弄一扁舟



眉菴集卷十二

眉菴集補遺

懷舊業

春館坐微雨午牕蘭氣清以茲魚鳥性遂適園林情佳
樹細花落清池圓葉生芳辰與幽賞欣此一來并

小孤山

江流西來如箭急孤峰橫截江心立桃花水漲勢相爭
峽口瞿塘猶不及山神堂堂心膽麓當是人間偉丈夫
江頭廟裡青綾帳翠靨紅妝塑小姑

南浦歌

朝發南浦棹莫聽南浦歌
春江與春草如此別離何
春風楊柳悲千縷秋水荷花暗江渚
白髮收眉灑灑霜青裙採綠絲絲雨
沙渚東邊是蓼洲人家高繫木蘭舟
還乘紫極宮前月移過秋屏閣下遊

感春

春水又盈尺鶯花未滿林
草於閒處綠愁向夜來深
野鳥丁寧意江雲去住心
從來布衣願不必問多金

一窗秋影

窈窕梧桐樹參差桂竹林如何數枝影共此一窗陰雲
破月華滿夢回秋意深相看竟長夜脈脈故園心

滕王閣圖

地湧三重閣江橫百尺臺渚霞朝牖闢山雨暮簾開金
奏雲中落銀屏月下來虹霓明綺席星斗弄珠胎歌舞
俄成夢登臨信可哀畫圖迷蛺蝶文甃積莓苔憶赴閣
公宴曾誇子建才長天與秋水千古共徘徊

冰連日毒熱思冰不可得因賦五言排律一首
書簃上庶幾望梅止渴之意也仍邀來儀季廸

幼文三文學同詠

凌室啟深藏殊恩錫上方壺清迷練色甌薄耀寒光當
座人俱素登筵體共涼瑩含銀汞潔甘薦蜜脾香淺碧
迎歌扇微紅暎舞裳明愁難作鑑堅恐易成漿瑞擬金
窗雪勛高玉井霜屏慚雲母熱簾詫水晶涼醉客狂思
躡詞臣渴願嘗陳王方避暑突兀殿中央

燈夕觀妓戲作艷語

舞緩態偏濃歌停拍未終
釵留人勝雪釧響臂羅風不
畫眉長綠非酣臉自紅
意將回眼送嬌逐點頭通此夕
瑤臺下當時洛浦中
莫言常見慣腸斷杜司空

栽竹

斲開蒼蘚種琅玕
移得瀟湘入座看
宿土半含春雨潤
短籬斜弄午風寒
紫苞未見搖冰雪
翠實終當宿鳳鸞
何處玉笙吹夜月
碧桃零落滿東關

王蒙畫西山圖

楚山迢遞隔江齊
江上人家盡向西
缺處每逢新月上
淡中長映夕陽低
清憐爽氣晴猶濕
紫護烟光畫欲迷
無復滕王高閣上
珠簾暮雨正淒淒

春夢 三首

春夢復春夢
春夢何時醒
昨日梨花白
今朝梅子青

其二

春夢復春夢
夢好不知春
只有雙蝴蝶
憐他夢裏人

其三

春夢復春夢，夢覺春無迹。
何處覓殘紅，東南數峰碧。

絹扇

紈扇娟娟白，簫簫箇箇青。
如何明月裏，吹下鳳皇翎。

半身美人圖

畫師有意畫風流，畫到風流意便休。
記得去年春雨後，杏花院裏短牆頭。

眉庵集補遺

眉菴集後志

眉菴楊先生孟載吾蘇之吳邑人家天平山南赤山下自幼敏悟絕人日記數千言弱冠工文詞議論古昔亦數萬言謂之論鑒嘗挈以試儀曹值元季兵興弗果就職當時文章大家若饒叅政介之周左丞伯溫見皆竒之會稽楊廉夫以詩伯一時少所推可僑寓雲間往來吳下以所號鐵笛謂先生能歌之乎先生曰不惟為作鐵笛歌尤且切效老鐵體翌日成以示廉夫不覺自失

曰吾意詩徑已蕪今復得子老鐵當退步讓爾出一頭地也遂偕之東遊呼所從者曰吾在吳又得一鐵來矣若等就之學優於老鐵學也交與成忘年故當時有老楊少楊之稱云避兵圍城中日與才友高李迪王止仲張來儀徐幼文輩相倡和以自適迨我聖祖肇基之初即受薦任河南滎陽令尋謫鍾離閒居秣陵江濱久之又用薦為江西省幕賓以累復落職處句曲山中又起奉使湖南廣右既而擢山西按察副使陞按察使而卒

此履歷聞諸故老驗諸詩所載特其大槩緣當時無有
筆其行實者故莫克致詳然先生平日之詩甚富皆率
意為之累不存稿嘗見先生自序一袂云因吾友方君
不得見予全集為恨故留此以示之爾則是先生盛年
稿已散失今流傳人間者十無二三況皆抄本又無序
志家異而人殊後至天順間郡人鄭教授嘗為刊行間
多訛謬矧諸奇作失載識者病焉習在髫齡即愛誦先
生之詩徧假抄錄覲圖彌盈及長而仕偕以出入有年

猶每隨訪隨錄卒莫致其全茲官嶺表念齒已邁爰命庠生顏恭文起會各本錄就請前翰林學士西蜀江君序諸首重圖鏤梓以傳噫文章在穹壤間譬之精金美玉不求乎人而人自即之無有久暫而異所好然好金玉之寶者衆人之常情而文章雅澹非有景賢好古之心莫克以致其所好之篤也習為鄉之晚生敬慕前哲之言自幼抵老不忍泯泯是固庸陋無文不能表章乎幽潛則區區素願詎不由之而少慰哉若夫先生學力

之充才氣之雄以致詩之清豪自成一家言者覽是即
當自得之茲不瀆

眉菴集後志